

कवि इन्दरजीत केसर दी रचना—सूखम क्यारी - इक जाणजा

□ डॉ० सत्यपाल श्रीवत्स

डोगरी काव्य साहित्य दी फुलबाड़ी च कवि इन्दरजीत केसर हुंदा नमां कवता संग्रैहू - 'सूखम क्यारी' इक नमें गुलदस्ते आहला लेखा आई जुड़ेआ ऐ, जिसदा अस दिलै दियें गैहराइयें कन्नै सुआगत करने आं।

इस कवता संग्रैहू च 65 कवतां ते 5 गीत न। इयां कुल मलाइयै एहू 70 रचनें दा संग्रैहू ऐ। कवि ने उआं ते मतियें कवतें आस्तै ओहू बिशे चुने दे न जिंदा साढ़े बाहरी जीवन कन्नै गै नेई बल्के मानसक वृत्तियें कन्नै बी सि'दा सरबन्ध ऐ, पर किश नेहू बिशें गी बी अपनियें कवतें दा माध्यम बनाए दा ऐ जेहूडे दैनक जीवन कन्नै बा-बस्ता होदे होई बी साढ़ी उपेक्षा दे म्हेशां शकार रौहंदे न। अपने परिवेश च रोजमर्रा घटने आहलियें घटनें कोला अनुभूति प्राप्त करियै उ'स्सी अपने संवेदनशील मानसक धरातल उप्पर तुआरियै, पचाइयै ते भोगियै कवता रूप च सैहज ढंग कन्नै प्रगट ते उजागर करना इक सराहने-जोग कवि-कर्म ऐ। इससै आस्तै काव्य शास्त्र च इयै नेहू कवि गी 'मनीषी' ते 'स्वयम्भू' आखेदा ऐ।

कवि इन्दर जीत केसर दियें कवतें दे बिशे मुख रूप कन्नै मनोविज्ञानक, समाजक ते परिवारक जीवन, रीति-रवाज प्रेम ते रोमांस किश ध्यार, प्राकृतक दृश्य, वर्तमान समाज च होने आहलियां हेरा-फेरियां ते चाल-चलत्तरें दा लेखा जोखा इतिवृत्तात्मक ते प्रतीकात्मक दौनी चाल्ली दा होऐ दा ऐ।

कवि अपनी 'आस' कवता च आखदा ऐ जे अपने जीवन च असें कदें बी नराशाबादी नेई होना लोडचदा ऐ भाएं नराशासूपी खूंढी आरी साढ़े उप्पर अपने किन्ने बी बार चलाऽ। इस लेई असें म्हेशां 'आस' दा गै लड़ पकड़ना चाहीदा ऐ तां गै अस अपने जीवन गी सफल बनाई सकने आं :-

पली नराशा पलदी गै जानी,
आरी एहू खूंढी चलदी गै जानी।
कुसै ना कुसै हीले नै टालो।
मनें च कदें नराशा नीं पालो।' पृ० 15

कवि 'लोऽ' शीर्षक कवता च अपनी पत्नी गी लोई दा प्रतीक समझियै अपनी संवेदना इस कवता च बड़ी खूबसूरती कन्नै तुआरदा ऐ। कवि आखदा ऐ जे उसदी पत्नी उसदे आस्तै 5 अर्थात् प्रेरणा दा स्रोत ते सच्चा जीवन साथी सब किश ऐ -

पैहलें केह हा एह घर मेरा, मन एह अज्ज बचारै,
जदुयें दी तूं घर आई दी, लोऽ गै लोऽ ऐ सारै।
मेरी जिंदगी डबरी बिच्चा, कड्डी तूंयें तारी,
तेरी गै सुध-बुध नै रानी, मेरी बत्त सुआरी।

रुक्खी मिस्सी भलिये लोके, खाइयै दिन गजारे,
जदुयें दी तूं घर आई दी, लोऽ गै लोऽ ऐ सारै। पृ० 23

श्री मद्भगवद् गीता गी मलाइयै साढ़े शास्त्रें ते आधुनक मनोविज्ञानकें, बिचारकें ते चिन्तकें माहनू मन दे बारे च नेकां ब्याख्यां पेश किती दियां न। कवि केसर होरें बी अपनी 'मन' शीर्षक कवता च मनै संक्षिप्त पर सार गर्भत ते पते आहली ते कन्नै खूबसूरत तस्वीर पेश कीती दे ऐ :-

हिरणें आंगर दौड़दा जंदा ऐ, भलेआं बेलगाम,
नां कोई न्हाड़ा दोस्त मित्र नां चाचा नां मामां।

× × × × ×
न्हाड़ी पीड़ सदा गै सजरी, हर इक्क तांहग कुआरी,
आप मुहारै मड़ा एह केसर, अम्बर भरै डोआरी ॥ पृ० 29

सहाडे समाज च फैली दी नशे दी मलामत दे खलाफ कवि दा जबरदस्त रोह ते आक्रोश । ओह आखदा ऐ जे नशा भाएं कुसै बी किस्म दा होऐ एह माहनू दे शरीर गी फूकी रखदा । नशे आहले माहनू दा परिवारक जीवन अति दुखी ते संकट-ग्रस्त होंदा ऐ। सब थमां बड्डी लल एह जे नशे आहलें दी समाज च नां कोई इज्जत होंदी ते नां गै खास पुच्छ-गिच्छ -

- "तन ऐ खीर फकोई जाना,
की ठिड्ड ऐ पैहलें फूकै दा,
एह दड़ा ऐ छाती बज्जै दा,
ते सप्यें आंगर सूकै दा।"

× × × ×
टब्बर सारा ऐ सैहमें दा,
ते लाड़ी तरले पांदी ऐ।
आंढ गुआंढ ऐ मौजू कसदा,
इज्जत बी फरलांदी ऐ। - पृ० 33

कवि अपनी - 'चित्त-चेते' कवता च अपने बचपुने ते बीते दे जीवन दे चेतें गी बड़े शब्द - चित्रात्मक ढंग कन्नै चित्तरत करदे होई आखदा ऐ जे उ'स्सी बचपुने दियां खेदां, सुनी दियां कत्थां-कहानियां सब इयां चेतै औंदियां न जियां कल्ले दियां होन -

'गुल्ली ते डंडा बी खेढे बथ्हेरे,
निक्खर जे पेई तां अत्थरूं केरे।

× × ×
चेता मीं हर इक्क मेरी शतानी,
इयां बझोंदा जे कल्लै दी कहानी।

× × ×
स्कूलै च डैस्कै दे उप्पर खड़ोना,
अत्थरुयें अपना मूंह पही धोना।

मास्टरै शा मुश्कल ही जिंद बचानी,
इयां बझोंदा जे कल्लै दी कहानी ॥ -पृ० 65

अज्ज दे समाज च दोहरे चरित्तर आहले माहनूएं दियें चालें ते हरकतें दा कवि इयां चित्तरन करदा ऐ जे से 'ई होंदा ऐ जे कवि गी इयें नेह लोके कन्नै केई बास्ते पेदे होने न जिस कन्नै उ'स्सी मते कौड़े अनुभव होऐ दे न। कवि अपनी 'पंज्जा' शीर्षक कवता च आखदा ऐ जे स्वार्थी ते चापलूस लोक अपना उल्लू सिद्धा करने आस्तै केई किस्में दे हरबे अख्यार करदे न। जिस कोला उनें गी कोई गर्ज होऐ जां जिस कोला उनें अपना कम्म कढ़ाना होऐ उस दियां सिफतां ते हर किस्में दियां चापलूसियां करने कोला जरा बी परहेज नेई करदे ते जिसलै अपना कम्म जां मतलब निकली जाऽ तां आऊं कु'न ते तूं कु'न मुहावरे गी चरितार्थ करियै कनारा गै नेई करी लेंदे बल्के जान पन्छान बी भलाई दिंदे न। कवि इयें नेह लोके दा बड़ा गै यथार्थ चित्तरन करदे होई आखदा ऐ -

जेहड़ियां सिफतां नेई हुंदियां, उब्बी गाई सनांदे,
झूठी सिफतें अंदरो-अंदरी, चाघे मड़ो चगहांदे।

कम्मै मगरा नेई पछानन, पुट्ठी मारदे बाजी,
हत्थ मलाना छिंडे रौंहदा, गल्ल करियै नेई राजी ॥ पृ० 71

कवि इन्दर जीत केसर गी प्रकृति कन्नै बी बड़ा लगाव ते प्यार ऐ। जियां उसदी पैनी नजर ते प्रतिभा चक्षु अपने चारै पासै घटने आहलियें घटनं गी ते समस्यें गी यथार्थ दी विश्लेषणात्मक कसौटी पर परखने दी समर्थ रखदी ऐ ठीक उआं गै प्रकृति दे हर तत्त्व गी बी जानदी-पन्छानदी ऐ। कवि चन्न ते उसदी चाननी गी पति ते पत्नी दे प्रतीकें कन्नै चित्तरत करदे होई उंदे रोमांटक दृश्य बी बड़ी खूबसूरती ते काव्यात्मक ढंग कन्नै उजागर करदा ऐ-

- 'जेहलमें दै कंढै ते तारें दी लोई,
चनै ने अड़ेओ चाननी ही ब्होई।
हस्सी-हस्सी मिलियै दमें पसोते,
जेहलमें च मारे हे दौनीं जनें गोते।

× × ×
सारें दै सामनै ओ प्यार कियां करदे,
बदली ने काले-काले करी दित्ते परदे।
झुंड छूहता चनै ते चाननी संगोई,
चनै ने अड़ेओ चाननी ब्होई॥ पृ० 96

इस संक्षिप्त सर्वेखन कोला बी अस कवि इन्दर जीत केसर दी रचना धर्मिता दे बारे च भाएं इक झलक गै दिक्खी- सकनेआं पर इस कोला बी एह अन्दाजा ते सैहज गै लगगी सकदा ऐ जे कवि केसर च इक जागरूक ते प्रबुद्ध ते मौलक कवि बास करदा ऐ जिसदी सिर्जना साढ़े मनै दे तारें गी स्पर्श करियै उंदे च इक नमीं हलचल पैदा करी दिंदी ऐ। इनें कवतें च इक नोखा पर सैहज प्रवाह ते सादापन ए सेही होंदा ऐ जे एह कवतां कवि दे हिरदे च आप मुहारियां फुट्टी दियां सीरां न तां गै इंदे च इक नोखा चमत्कार ते कशश ऐ। केइयें कवतें च अस उस सार्वभौमकता (universality) दे बी दर्शन करने आं जेहड़ी उनें गी चिरस्थायी बनने दी समर्थ दिंदी ऐ। जित्थें इंदे च डोगरी दे स्वात्म दे अनुरूप सरल छंदें दा प्रयोग होए दा ऐ उत्थें अलंकारें ते प्रतीकें इन्दे च उन्ना गै थाहर हासल कीते दा ऐ जिन्ना कवता च चमत्कार पैदा करने आस्तै उंदी लोड़ ही।

कवि दी भाशा ठेठ डोगरी ऐ ते उसदे च सभावक सरोखड़पन ऐ। अप्रसिद्ध शब्दें दा प्रयोग कुतै-कुतै उत्थें गै होए दा ऐ जित्थें छंद पूर्ति आस्तै उंदी मती लोड़ ही।

डोगरी हिंदी शब्दकोश

मुल्ल : 200 रपेS

viii+778 सफे

(लेखकें ते रिसर्च स्कालरें आस्तै 50% रिआत)

मिलने दा पता :-

अतरिक्त सचिव, जे. एंड. के. अकैडमी ऑफ आर्ट

कल्चर एंड लैंग्वेजिज, केनाल रोड, जम्मू-180 001

फोन : 577643, 579576